

Dxihtsi nin baca'h San Pahblu loh ra' bwiinn Efesu

GuelrgahpaDxiohs

1 Na'h Pahblu, naan tuhbi
pooxtla xteenn Jesucristu
laasii zi'chi xclaa'dzi Dxiohs gaca.
Pwihs cagaca'hn dxihtsi rii' loh
tu bwiinn Efesu ra' nin baguyuu'-
guya'zi guelriachiisto' xchi'dxyi
Jesucristu, neezaa loh ra' nin ruhnn
ziga pa'hca xclaa'dzi Ni'h gaca.
2 Gulguica'ha guelrahcanee cun
guelrbwihdxyii sto' xteenn Xtaada
Dxiohs nu'h cun nee xteenn Daada
Jesucristu.

Ruluu'yi Pahblu xcweenta guelrza'cazii nin bat'i'dxiloh Jesucristu pur la'hnu'h

3 Pwihs gachiñi'za'ca nu'h lah
Daada Dxiohs nin naa Xtaada Daada
Jesucristu, nee ziga naa nu'h tuhs
cun Jesucristu nin nuu llaa'ndxibaa'
ni'chin nezchi riinloh garaaloh
guelruhntaa'yi nin rahcanee Ni'h
la'hnu'h. **4** Dxiohs gulii Ni'h la'hnu'h
pur xcweenta Jesucristu galohyi
chin nagahdxi cwachixchih Dxiohs
guidxyiyuh tin zi'chi loh si Ni'h
chuu nu'h guidi'hnn nu'h xtsi'n
Ni'h cun guelnayaa lasto' xteenn
nu'h nee la'h si Ni'h gaca'hsto'

nu'h. **5** Nee guca'ha Ni'h la'hnu'h
tin gaca nu'h ziga llia'n dzi'tsi
pa'ca Ni'h pur xcweenta Jesucristu,
laasii zi'chi bwi'hnn Ni'h lligaaba
pur nin bayuu'n sto' Ni'h la'hnu'h.
6 Pwihs pur ni'chin rachiñi'za'ca
nu'h lah Dxiohs garaa dxyih pur
ziga bayuu'n sto' Ni'h la'hnu'h, ya
bwi'hnnntaa'yi Ni'h la'hnu'h pur nin
naa nu'h tuhs cun Llia'n Ni'h nin
nadzii'hi Ni'h. **7** Ya ziga taantu nin
guhca nadzii'hi Dxiohs la'hnu'h,
balda'h Ni'h la'hnu'h loh duhlda pur
xcweenta rihn nin guxi'hi Llia'n Ni'h.
8 Dxiohs cagaluu'yi Ni'h balaaca
chi'h nin nadzii'hi Ni'h la'hnu'h
ziga cagani'hi Ni'h guelnasiin
cun guelrahcabwa' la'hnu'h,
9 nee cagaluu'yi za Ni'h la'hnu'h
dxyi'dxyi ra' nin nuugula'n Ni'h
loh xigaaba Ni'h nin ayi bwi'hnn
Ni'h para ña'zidziahga ra' bwiinn
dez galohyi laasii bwi'hnn Ni'h
lligaaba nahpa guluu'yiloh dzi'n ra'
chi pur xcweenta Jesucristu, **10** per
nahpa zadzihm dxyih nin soobaa
garia'caa gaca ziga lligaaba nin
bwi'hnn Dxiohs, ya loh dxyih chi
zutiaa'ha Dxiohs garaatii' ra' cohsa
nin nuu nez dxibaa' cun nin rii loh
guidxyiyuh tin guti'dxi Ni'h la'h

ra'n nezloh naa Jesucristu tin zi'chi
guinabwa' Jesucristu la'h ra'n.

¹¹ Dxiohs rahca ruhnn Ñi'h
xichi'hzi ni'chin ayi guinagahn
guunn Ñi'h ninchi'hzi nin
guiclaa'dzi Ñi'h naa bwen guunn
Ñi'h; gulii Ñi'h la'hnu'h tin naa nu'h
tuhsii cun Jesucristu tin gachica'ha
nu'h hereensi nin bwi'hnn Dxiohs
lligaaba guni'hi Ñi'h la'hnu'h.
¹² Bwi'hnn Ñi'h baria'caa guhca
squii' tin guiñi'za'ca ra' bwiinn
ziga naa lah Ñi'h cun xquelrnabwa'
Ñi'h pur nin gwa'ha ra' ba xa
naza'ca naa Dxiohs cun la'hnu'h
nin naa bwiinn ra' nin mwerdo'tii'
gwachiisto' ra'ñi'h xchi'dxyi
Jesucristu. ¹³ Zi'chiza la'h tu chin
bihn tu dxyi'dxyi nin naa guchii,
dxyi'dxyi nin ruta'h la'h bwiinn loh
duhlda, ya zi'chi gwachiisto' tu la'h
Jesucristu cun guhcaza tu tuhsii cun
la'h Ñi'h. Ya ni'chin gucah tu bwa'
xteenn Spíritu Saantu xteenn Dxiohs
la'n lasto' tu nin bia'han dxyi'dxyi
Ñi'h guca'ha tu. ¹⁴ Dxiohs bani'hi
Ñi'h Spíritu Saantu xteenn Ñi'h
lasto' ra' nu'h tin guidu'hun guchiiza
gachica'ha nu'h hereensi nin gudi'hi
Dxiohs guica'ha ra' xpwiinn Ñi'h
chin guza'loh Ñi'h xtsi'n Ñi'h, ya
squii' naa ziga gazaa' ziga guta'h
Ñi'h la'h garaa ra' nin baca'bwa' Ñi'h
gaca xpwiinn Ñi'h, tin guiñi'za'ca ra'
ba lah Ñi'h cun xquelrnabwa' Ñi'h.

**Rbwihdxyi-rnaaba Pahblu
loh Dxiohs tin guzia'ñih Ñi'h
loh xigaaba bwiinn ra' nin
gwachiisto' ra' xchi'dxyi Ñi'h**
¹⁵ Pwihsii ziga biindxiaagapa'hnn
xcweenta ziga riachiisto' tu
xchi'dxyi Jesucristu nee ziga

nahpa za tu guelnadzii'hi
lasaa' lasto' tu cun garaa ra'
xpwiinn Jesucristu, ¹⁶ pwihsii
ni'chin nin ayi radxahga'hn
rudi'hihn guelzuxchiilli nezloh
Dxiohs pur xcweenta tu chin
rbwihdxyi-rna'ba'hn nezloh Ñi'h.
¹⁷ Rbwihdxyi-rna'ba'hn loh Dxiohs
nin naa Xtaada Daada Jesucristu,
Xtaada Dxiohs Ñi'h nin rnabwa'
llaa'ndxibaa', tin guni'hi Ñi'h la'h
tu tuhbi guelrahcabwa'roo' nee
cun tuhbi guelruluu'yiloh xteenn
ra' lligaaba nin nuula'n tin zi'chi
gadzih gacabwa' ru tu xa naa
xcweenta Yu'bi Dxiohs, ¹⁸ nee cun
rna'bazahn tin guzia'ñih Ñi'h loh
xigaaba tu para gacabwa' tu cuun
ni'ca nin naa guelnaza'ca nin
naannloh tu zuni'hi Ñi'h la'h tu
laasii gudihdxyi Ñi'h la'htu pur
nin riachiisto' tu xchi'dxyi Ñi'h ya
balaacachi'h lasahca guelña'ñihroo'
nin gudi'hi Ñi'h ziga hereensi
la'h ra' xpwiinn Ñi'h, ¹⁹ nee cun
balaacachi'h guelrnabwa' roo' nin
na'zuu guzuh hasta ayi ria'lohtii'
loh hasta na'zuu xquelrnabwa' Ñi'h
nin nahpa na'zu ca'ha Ñi'h para
la'h nu'h ziga naa nu'h bwiinn
ra' nin ya gwachiisto' xchi'dxyi
Ñi'h. Guelrnabwa' rii' naa nin
la'hgahca nin baluu'yi Dxiohs cun
gaduhbi la'ga'tii' xjweersi Ñi'h
nee cun gaduhbi guelnadxiipa
xteenn Ñi'h ²⁰ chin bacwa'hnn Ñi'h
la'h Jesucristu, ya batidxi Ñi'h
la'h Jesucristu tin guzohba Ñi'h
xladu nanchii Daada Dxiohs nez
dxibaa' tin zi'chi ya na'zuu ca'ha
Ñi'h guelrnabwa', ²¹ pwihsii nahpa
Ñi'h guelrnabwa' loh cuunchi'hzi
gubieerna, nee loh cuunchi'hzi

guelrnabwa', nee loh cuunchi'hzi
guelrdz'i'baloh loh snuhn ra' bwiinn,
loh chyu chi'hzi bwiinn nin rnabwa',
nee cun cuunchi'hzi lah bwiinn nin
rdz'i'baloh ruze'ta bwiinn nin nuu
ra' nnah tantu loh guidxyiyuh rii'
nee tantu ziga loh guidxyiyuh cuubi
nin ze'-yahlda dxi'. ²²Ya Dxiohs
batsiiga garaatii' cohsa nez ñaa'
Jesucristu cun neezaa bazuh Dxiohs
la'h Jesuhs tin naa Ñi'h nin rnabwa'
loh garaa ra' bwiinn nin naa xquido'
Ñi'h, ²³pwihsí xpwiinn guido' Ñi'h
naa ra' ba ziga tiхи Ñi'h ya ziga
ruti'dxi Dxiohs garaatii' nezloh
Jesucristu, zi'chiza la'h Ñi'h ruti'dxi
Ñi'h garaa ra' za cohsa nezloh ra'
bwiinn nin naa xquido' Ñi'h.

**Ruta'h Dxiohs la'h nu'h loh duhlda
laasii nadzii'hi Ñi'h la'hnu'h**

2 Galohyi guhca tu zigazi
bwiinn guuchi pur xcweenta
garaloh ra' cohsa dxaaa xteenn
duhlda nin guluu'tii tu nez loh
Dxiohs, ²pwihsí loh nin gubahan tu
squii' gwana'hla tu ganaalla xtsi'n
ra' bwiinn loh guidxyiyuh rii', cun
bwi'hnn za tu garaa nin guhca
xigaaba bwiinndxaaba nin rnabwa'
loh guidxyiyuh rii', ziga zeezah
rusazi'guehlda ba lasto' bwiinn
ra' nin nagahdxi guzo'badxiaha
xchi'dxyi Dxiohs. ³Nee hasta la'hza
nu'h gubahan nu'h ziga la'h ra'
ba loh dxyih ra' nin ya gudii'dxi,
bidi'hnn nu'h nin guclaa'dzichi'hzi
tiхxi nu'h cun bidi'hnn za nu'h
ninchi'hzi nin bie'suh loh xigaaba
nu, ya zi'chi baria'caa neezaa
nu'h bidxyi'chinee Dxiohs la'h
nu'h ziga rdxyi'chineeza Ñi'h la'h
ra' snuhn bwiinn guidxyiyuh

nin ayi nnaa guzo'badxiaha
xchi'dxyi Ñi'h. ⁴Per Dxiohs, balaaca
chi'h nin naza'caduxa naa Ñi'h
ni'chin balahsasto' Ñi'h la'hnu'h,
⁵ya bani'hi Ñi'h guelnabahan
la'hnu'h loh nin guhca nu'h zigazi
bwiinnguuchi loh duhlda, yannah
nahpa nu'h guelnabahan rii' pur
nin naa nu'h tuhsí cun Jesucristu,
nee gula'h nu'h loh duhlda pur nin
balahsasto' Dxiohs la'hnu'h. ⁶Chin
bacwa'h Dxiohs la'h Jesucristu loh
guelguhchi, neezaa nu'h bwi'hnn
Dxiohs lligaaba gula'h nu'h loh
duhlda tin guhca baria'caa ziga
neezaa nu'h bacwa'hnnne Dxiohs
la'hnu'h tuhsí cun Jesucristu, ya
chin guzohba Jesucristu lahdu
nanchii xteenn Dxiohs nu'h neezaa
nu'h guhldaa nu'hnn. ⁷Bwi'hnn Ñi'h
squii' tin ruluu'yi Ñi'h la'hnu'h
loh dxyih ra' nin ze'-yahlda
balaaca chi'h naa guelruca'hsto'
cun guelralahsasto' xteenn Ñi'h
cun la'hnu'h pur naa nu'h tuhsí
cun Jesucristu, ⁸pwihsí pur nin
balahsasto' Dxiohs la'hnu'h, ni'chin
bata'h Ñi'h la'hnu'h loh duhlda
chin gwachiisto' nu'h xchi'dxyi
Ñi'h. Ni'chin ayi guunn tu lligaaba
bidxeela tun pur la'hgahca
xcweenta tu sino que guca'ha tun
laasii Dxiohs naa nin bani'hin la'htu.
⁹Nee ayiza guhcan pur xcweenta
xiilla tuhbi dzi'n za'ca nin ñuhnn
biñaachi tin zi'chi ayi chuu nin
tuhbi nin guunn nayaachi, ¹⁰laasii
Dxiohs naa nin gulahchixchih la'h
nu'h, nee la'hzaÑi'h gulahchibiniñh
la'hnu'h cun Jesucristu tin
guidi'hnn nu'h dzi'n za'ca ra' nin
bwi'hnn Ñi'h lligaaba des galohpii'yi
nin nahpa guidi'hnn nu'h.

**Guridxyiisto' Dxiohs cun
la'h nu'h pur Jesucristu**

¹¹Pwihs i gulgaza'sto' tu, la'htu nin ayi naa ra' bwiinn Israel, nin rñi' ra' ba loh ra' ñi'h "bwiinn ziit" laasii ayi tu bwa' nin riuu' ra' bwiinn Israel, ya cun naa ra'zi bwiinn guidxyiyuh riuu' bwa' chi tiхи bwiinn, ¹²nee gulgaza'za sto' tu loh dxyih ra' nin gudii'dxi ayi nu'nawa' tu la'h Jesucristu, nee cun bia'han zihtuza tu nezloh ra' bwiinn Israel, nee nin ayiza xi cweenta badi'hi tu ziga bia'hannee dxyi'dxyi Dxiohs la'h ra' bwiinn Israel. Sola guca'nzaa tu loh guidxyiyuh nicala zigachi'hzi ña'loh xquelnabahan tu ayi biu'nawa' tu la'h Dxiohs nee nin ayiza xi lligaaba badzihh yihca tu ñidxi'hyi tu xa ñacanee Ñi'h la'htu. ¹³Per ya ziga nnah, ziga naa tu tuhs i cun Jesucristu pur xcweenta llarihn Ñi'h nin guxi'hi Ñi'h, la'htu nin guzah zihtu nez loh Ñi'h galoh nnah la'htu zeezah gahxu nezloh Ñi'h, ¹⁴ni'chin nnah Jesucristu naa guelridxyiisto' xteenn nu'h; la'h Ñi'h bachi'dxiu-bacha'ga Ñi'h la'h ra' bwiinn Israel nee cun la'h ra' za nin ayi naa ra' bwiinn Israel, tin gaca ra' ba tuhs i guihdxyi xteenn Dxiohs loh nin bazia'tii Ñi'h xcweenta dzi'n lehyi ra' nin bwi'hnn guhpaaallahn lasaa' tu, ¹⁵per ya ziga gucah tiхи Jesuhs loh cruhzi, bwi'hnn Ñi'h gahn bazia'tii Ñi'h dxyi'dxyi ra' xteenn lehyi nin bwi'hnn guyuu'llahn sto' ra' bwiinn Israel cun la'h ra' bwiinn ziit, ya ziga gwabiiga garoopa cwa'h ra' ba nezloh Jesucristu chin gwachiisto' ra' ba xchi'dxyi Ñi'h, biuhn Ñi'h

la'h ra' ba tuhs i guihdxyi cuubi, tin zi'chi gurihdxyiine lasto' lasaa' ra' ba. ¹⁶Nee pur nin guhchi za Ñi'h loh cruhzi, bañihchiloh Ñi'h guelrdxihndxinee lasaa' xteenn loh garoopa cwa'h bwiinn guihdxyi ra', ya zi'chi badi'hi Ñi'h gaapaa ra' ba guelnadzii'hi lasaa' nezloh Dxiohs tin biahca ra' ba tuhs i tiхи Ñi'h.

¹⁷Zigaza caa ra' dxyi'dxyi ra' rii' loh Xchihtsi Dxiohs:

Bi' Ñi'h tin baluu'yi Ñi'h xa cwidxyiisto' bwiinn cun lasaa' ba nicala bwiinn nin bia'han zihtu nezloh Dxiohs nee nicalaza nin rii gahxu nezloh Ñi'h.

¹⁸Laasii pur xcweenta Jesucristu ziga tuhs i ziga stuhbi ra' nu'h rahca zogadzihh nu'h nezloh Daada Dxiohs pur tuhs i Spíritu Saantu nin ruhn biñih Ñi'h la'n lasto' nu'h. ¹⁹Pwihs i ni'chin nnah la'htu ayiru naa tu bwiinn ziit, nee ayiruza nabahan tu zihtu hasta naa lahdxyi tu, laasii nnah la'htu nuu dxa'ga loh guihdxyi nin naa xteenn Dxiohs, nee naa za tu bwiinn nin nuu ra' yihdzi Dxiohs.

²⁰La'htu naa tu zigazi tuhs i yuu' roo' nin guyahsa yihca ziga tuhs i muru dxiah nin naa ra' ziga pootla ra' cun profeta ra', ya Jesucristu ga'h naa ziga dxiah nin mwer guzuh xchihh yuu' chi. ²¹Ya yuu' rii' cagaza' Dxiohsan pur nin naa tu xteenn garaa lahdu yuu' rii' hasta gadzihh cha'löh gacan xquido' Daada Jesucristu, ²²ya zi'chi la'htu cun neezaa ra' bwiinn Israel nin gwachiisto', ziga dxi'dxiu-dxa'ga tu la'h Jesucristu, rdxa'galasaa' tu tin zi'chi gadzihh gaca tu tuhs i yuu' nin chuu Dxiohs pur xcweenta Spíritu Saantu Ñi'h.

**Biga'bi Pahblu tin chegaluu'yí ba
xchi'dxyi Dxiohs loh ra' bwiinnziitu**

3 Pwihsí na'h Pahblu, pur
xcweenta dxyi'dxyi ra' rii'
nuu ñie'w'hñ la'n lahtsi dxi'ba pur
xcweenta xchi'dxyi Jesucristu nin
rulu'yí'hn loh tu bwiinn ra' nin
ayi naa ra' bwiinn Israel, ²pwihsí
banaa gulgacabwa' la'h Ñi'h
baca'bi Ñi'h na'h tin gulu'yí'hn
xchi'dxyi Ñi'h la'htu. ³Dxiohs
baluu'yí na'h ziga naa xigaaba
lliga'tsi xteenn Ñi'h ziga nin ya
la'n baca'hlá dxihtsi loh tu. ⁴Ya nin
gu'lða tu dxihtsi chi zacabwa' tu
nu'n'bwa'n xa naa dxyi'dxyi naga'tsi
xteenn Jesucristu. ⁵Dxyi'dxyi nin
guhcanaga'tsi ra' chi ayi chyu
bwiinn baluu'yilohtii'in loh ñi'h loh
dxyih ra' nin bagudii'dxi ziahan
duxala yihza, per yannah la'h
Dxiohs bwi'hnn para baluu'yiloh
dxyi'dxyi naga'tsi ra' chi nezloh ra'
pooxtla cun nezloh ra' profeta ra'
xteenn Dxiohs pur xcweenta Spíritu
Saantu xteenn Ñi'h, ⁶ya dxyi'dxyi
naga'tsi ra' chi naa dee ra': pur
xcweenta xchi'dxyi Jesucristu nin
ruta'h la'h ra' bwiinn loh duhlda,
ruhnn Dxiohs gaca ra' bwiinn ra'
nin ayi naa ra' bwiinn Israel tuhsí
guihdxyi cun bwiinn Israel nin
riachiisto' ñi'h xchi'dxyi Jesucristu
tin garoopa cwa'h ra' ba gaca
xteenn ra' ba hereensi nin bia'han
dxyi'dxyinee Dxiohs la'h ra' bwiinn
Israel.

⁷Na'h bie'dxiahldaa biga'bi'hn
gulu'yí'hn xchi'dxyi Jesucristu pur
balahsasto' Dxiohs na'h, nee rahca
ru'nnahn dzil'n rii' laasii rca'hahn
jweersi roo' nin runi'hi Dxiohs

na'h, ⁸nee nicala naan llihgui'hntii'
loh garaa ra' xpwiinn Dxiohs, na'h
naan nin bani'hi Ñi'h guelrahcanee
xteenn Ñi'h tin gulu'yí'hn xchi'dxyi
Ñi'h loh ra' bwiinn nin ayi naa ra'
bwiinn Israel tin gacabwa' ra' ba
balaaca chi'h lasahca nin nahpa
Jesucristu para la'hnu'h, ⁹ya
Dxiohs nin bwi'hnncha'yí garaatii'
baca'bi Ñi'h na'h tin gulu'yí'hn
la'h garaa ra' bwiinn xa naa
xcweenta dxyi'dxyi naga'tsi nin
guhpacha'yí Ñi'h loh yihza ra' nin
gudii'dxi tin nnahyi cayinlohon.
¹⁰Cagaria'caa squii' tin nnah pur
xcweenta bwiinn guido' ra', garaa
ra' guelrnabwa' ra' cun garaa ra'
guxchiisi ra' nez dxibaa' gadzih
gacabwa' ra' ba guelnasiin duxa
xteenn Dxiohs loh garaa ziga ruhnn
Ñi'h. ¹¹Dxiohs bwi'hnn Ñi'h lligaaba
squii' desde galohpii'yi ni'chin
bi' Daada Jesucristu tin baria'caa
guzohba talpa'h ziga guclaa'dzi
Dxiohs gaca. ¹²Ya pur xcweenta nin
riachiisto' nu'h xchi'dxyi Jesucristu
ayi riuu' guelnadxyi'bi lasto' nu'h
ziga choobiiga ganaaba nu'h nezloh
Dxiohs. ¹³Ya ni'chin rna'ba'hn
loh tu ayi guiria'hgahn tu pur nin
cagati'dxiloon pur xcweenta tu;
maz guldxiahxi laasii dee naa tuhbi
guelnaza'ca para la'htu.

Guelnadzii'hi lasaa' pur xcweenta Jesucristu

¹⁴Ya pur cweenta rii' ni'chin nin
rusia'chyu lliibihñ nez delaanta
loh Daada Dxiohs nin nabahan
dzi'tsi dxibaa', ¹⁵Dxiohs nin
baza'loh garaatii' ra' nin nuu nez
llaa'ndxibaa' cun loh guidxyiyuh.
¹⁶Pwihsí rbwihdxyi-rna'ba'hn

loh Dxiohs tin guutarlooh Ñi'h
guelnaza'ca xteenn xquelña'ñih
Ñi'h para la'htu nin gaca ziga
gaca nadxipasto' tu pur xcweenta
Spíritu Saantu xteenn Dxiohs
¹⁷tin zi'chi ba chuu nabahan
Jesucristu la'n lasto' tu pur tantu
nin riachii sto' tu xchi'dxyi Ñi'h
tin zi'chi guina'zu xtulbaa' za'ca
tu loh guelnadzii'hi lasaa' xteenn
Jesucristu, ¹⁸tin zi'chiza gadzihn
gacabwa' tu cun snuhn ra' xpwiinn
Jesucristu balaaca chi'h nabi'hyi
nee nu'hla nee gueeta nee naa
guiya' loh guelnadzii'hi lasaa'
xteenn Jesucristu. ¹⁹Rna'ba'hn
loh tu, pwihs, tin gulгадxi'hyi
loh guelnadzii'hi lasaa' xteenn
Jesucristu nin naa mahzi guroo'roo'
loh garaa ra' cohsa roo' nin bidia'ha
nu'h tin zi'chi baguibahannee nu'h
garaa xquelnaza'ca Dxiohs.

²⁰Yannah gaca lasahcaduxa lah
Dxiohs nin nahpa guelrnabwa' para
guunn ziahanroo duxa ru cohsa loh
nin ganaaba nu'h o nin guidi'hnn
nu'h lligaaba pur xcweenta
xquelrnabwa' Ñi'h nin nuu nabahan
la'n lasto' nu'h. ²¹Lasahca duxa naa
lah Dxiohs nezloh bwiinn guido'
nee pur xcweenta Jesucristu para
loh garaa dxyih nin banaa para
tu'pazi. Zi'chi gaca pwihs.

**Radxa'ga lasaa' nu'h
pur Spíritu Saantu**

4 Pwihs ziga ñie'w'hn
pur xcweenta xchi'dxyi
Jesucristu rna'ba'hn loh tu
gulguibahan ziga nin rga'ha
guunn tu la'htu nin bwi'hi pur
xigaaba Dxiohs. ²Gulgahca bwiinn
nado'laadzi, bwiinn naza'caduxa,

gulgahpa paseensi, nee gulgahpa
guelnadzii'hi lasaa' cun ziga tuhbi
cun ziga stuhbi lasaa' tu, ³nee
gulgui'hnn para guibahan tu tuhs
loh lligaaba tin ayi taa'ha loh
lasaa' tu cun guelrahcanee xteenn
Spíritu Saantu nee pur xcweenta
za guelridxyiisto' nin ruchi'dxiu-
rucha'ga la'htu. ⁴Zi'chi tuhs tihx
naa nu'h loh Jesucristu, nee tuhsiza
naa xigaaba nu'h cun la'h Ñi'h, cun
tuhs za hereensi nin naannloh nu'h
zachica'ha nu'h loh nin gudihdxyi
la'hnu'h, ⁵nee tuhs za Daada cun
tuhs za guelriachiisto', nee cun
tuhs za guelrohbañihsa, ⁶nee
nuu za tuhbi dxi'h Daada Dxiohs
nin rnabwa' loh garaatii', nin zuu
galaayillee garaatii' nee nuu Ñi'h
loh garaatii'.

⁷Per cada tuhbigah ra' nu'h
bachica'ha ra' nu'h dzi'n ra' nin
babwi'hnn Jesucristu lligaaba
bachica'ha ra' nu'h. ⁸Pwihs ni'chin
rñi' loh Xchihtsi Dxiohs squii':

Chin bacah Ñi'h llaa'ndxibaab'
hasta rnabwa' Ñi'h, ya
bwi'hnn Ñi'h gahn loh garaa
ra' guelrnabwa',
ya chi'chi bwi'hnntaa'yi Ñi'h
yihca ra' xpwiinn Ñi'h tin
guunn ra' ba xtsi'n Ñi'h.

⁹¿Xi zee loh dxyi'dxyi rii' ziga
rñi'in, "Bacah Ñi'h"? Pwihs ni
raria'caa rñi' dxyi'dxyi rii' naa
biehtaza Daada Jesucristu hasta
ria'han gabihldxyi. ¹⁰Nin biehta chi
ni'chi gahcan nin bacah za hasta
naa mahzi guiya'duxa nez dxibaa'
tin zi'chi guca'ha Ñi'h nahpa Ñi'h
guelrnabwa' nez dxibaa' cun loh
guidxyiyuh. ¹¹Ya la'h gahca za
Ñi'h bwi'hnn Ñi'h lligaaba bazuh

Ñi'h la'h ra' bwiinn nin naa ra' pooxtla, ya spaaldaa ra' ba bazuh Ñi'h ziga profeta ra', spaaldaa ra' ba ziga nin riogui'hnbiñih xchi'dxyi Jesucristu, spaaldaa ra' ba ziga gaca pastohr ra', cun spaaldaa ra' ba ziga mwehsu ra!. ¹² Ya zi'chi bazuh Ñi'h nin naa ra' xpwiinn Ñi'h tin guunn ra' ba dzi'n nin badi'hi Ñi'h cada tuhbigah ra' ba nee tin zi'chi guunn ra' ba chuu ziga llii'dzi tihx Jesucristu garaa lahd, ¹³ hasta gadzihnyi dxyih nin gaca garaa ra' nu'h tuhs loh ziga riachiisto' ra' nu'h nee gadzihnyi dxiu'nbwa' za'ca nu'h Llii'n Dxiohs, ya zi'chi gaca nu'h bwiinn nin baniin ca zuu loh ziga rahcabwa' nu'h xchi'dxyi Ñi'h, ziga tuhbi bwiinn nin baguroo' loh xquelrnabwa' Jesucristu. ¹⁴ Ya ayiru chyu gusaa'n gaca xigaaba nu'h ziga xigaaba biñi'n tin biñi'n ayi guinagahntii' ruhnn bwiinn gahn rusagui'hi ra' ba la'h ra' bi cun dxyi'dxyi nin ayi gallu'yi nin ruluu'yi ra' ba laasii nuu ra' bwiinn nin nasiin nin ruhnn ra' squii!. ¹⁵ Mahz bwen gabwe'hecaa nu'h guidi'hnn nu'h ziga chozah nu'h loh dxyi'dxyi nanchii cun guidxiaapaza nu'h guelnadzii'hi lasaa' lasto' nu'h cun chyuchi'hi bwiinn ni'chin nahpa guidi'hnn nu'h para chioo nu'h loh garaatii' guelnaza'ca xteenn nin naa Daada nin dzi'baloh loh nu'h nin naa la'h Jesucristu. ¹⁶ Ya pur Jesucristu rna'zu-dxa'ga ra' xpwiinn Ñi'h zigazi tuhbi tihx bwiinn tin zi'chi na'zu za'ca ra' ba tin rahcanee lasaa' ra' ba pur ziga naa xtsi'n cada tuhbigah ra' ba, ya zi'chi cadxi'hyi ra' ba xa

cayahca ziahanru ra' bwiinn loh guelnadzii'hi xteenn Jesucristu.

Tuhbi guelnabahan nacuubi nin rdxeela pur la'h Jesucristu

¹⁷ Pwihs i dxyi'dxyi ra' rii' naa nin rni'n loh tu nee ruca'bizañin la'htu pur lah Daada Jesucristu, ayiru chezah guibahan tu ziga nabahan ra' bwiinn nin ayi nu'nbwa' la'h Dxiohs, bwiinn ra' nin sola nabahan ra' loh lligaabachi'hz i nin riagadziba yihca ra' ñi'h. ¹⁸ Ya nuu nacahyitii' loh xigaaba ra' ba; la'h ra' ba ayi rudi'hi guuxta sto' ra' ba loh guelnabahan nin runi'hi Dxiohs laasii naa ra' ba bwiinn nadii'dxii' rwaal' ra' ñi'h, ¹⁹ nee ya guhca dxiipa sto' ra' ba ya guca'ha mahn ra' ba, ayiru xa dxia'chyu loh xigaaba ra' ba, ya zeeza'bi ra' ba loh garaaloh cohsa dxaaba ra', ²⁰ per la'htu ayi biu'nbwa'dxi'i tu Jesucristu, tin nee tu gaca tu bwiinn zi'chi ra', ²¹ ya sidela guchii tu bazo'badxiahga tu xchi'dxyi Jesucristu nee cun sidela neezaa basi'dxi tu xcweenta Ñi'h nin naa dxyi'dxyi guchii, ²² pwihs i basaa'n tu loh garaa cohsa ra' nin gudiil'dxi-guzah nin gubahan tu loh ñi'h. Pwihs i ni'chin nnah gulgasia'han garaa ra' cohsa dxaaba ra' chi nez dihtsi tu, laasii ni'chi ra' nin basagui'hi la'htu loh dxyih ra' nin gudiil'dxi. ²³ Ni'chin nnah gulgasacuubi lasto' tu cun loh xigaaba tu, ²⁴ nee gulgasacuubi za la'htu loh guelnabahan nacuubi nin basiinloh Dxiohs pur la'htu tin zi'chi pur xcweenta xchi'dxyi Ñi'h guluu'yi xquelnabahan tu tuhbi guelnabahan nayaa, tuhbi

guelnabahan nin nallu'yi para loh xtsi'n Dxiohs.

²⁵Pwihsí ni'chin ayiru chezah tu guuyi tu dxixi'hw, mahz gulguiñi' dxyi'dxyi nin naa guchii loh ra' lasaa' tu laasii la'hnu'h naa nu'h bwiinn ra' nin naa tuhsí famihyi.

²⁶Sidela la'htu rdxyi'chi tu gulguia'ha ayi dxiaaba tu loh duhlda, nee gulgui'hnn pur ayi gahw llahn lasto' tu loh gaduhbi dxyih. ²⁷Ayi gusaa'n tu gusia'chi bwiinndaaba lasto' tu.

²⁸Bwiinn nin naa bwiinn gubaa'n ayiru guunn ba gubaa'n, mahzi guunn ba dzi'n cun naa ba tin zi'chi gaapaa ba nin gacanee ba la'h ra' bwiinn ra' nin ayi xi nahpa.

²⁹Nee ayi gusaa'n tu guiria'h dxyi'dxyi nnah rwaa' tu, mahz gusia'ha rwaa' tu guíñi' tu dxyi'dxyi za'ca ra' tin zi'chi guunn tu gahn guchoo' tu ziga chechiisto' ra' snuhn bwiinn nin dxihnn dxiahga ra' xchi'dxyi tu. ³⁰Ayi chi'hyi tu nez guibiin lasto' Spíritu Saantu xteenn Dxiohs nin bwi'hnn para gucah tu bwa' la'n lasto' tu para hasta loh dxyihyi nin gadzihn chee tu hasta nuu Dxiohs.

³¹Gulcwe'he sto' tu garaaloh ra' llahn nin cayuhnn naltaa la'n lasto' tu, ziga guelnadxyi'chi, guelrbwihdixdixiah cun guelrbwidxihndxinee lasaa', nee cun garaaloh ra' ru cohsa dxaaba ra'. ³²Gulgahca bwiinn nado'laadzi nee gulgalahsa sto' tu lasaa' tu ziga tuhbi ziga stuhbi ra' ba, nee gulgui'hnn pardohn lasaa' ziga tuhbi ziga stuhbi za tu zigaza bwi'hnn Dxiohs pardohn la'htu pur xcweenta Jesucristu.

Xa nahpa guibahan ra' bwiinn ra' nin naa ra' llii'n Dxiohs

5 La'htu nin naa ra' llii'n Dxiohs nin nadzii'hi dzi'tsi Ñi'h, gulgui'hnn pur gaca tu ziga la'h Ñi'h, ²gulgahpa guelnadzii'hi lasto' lasaa' tu ziga gahca guhpa Jesucristu guelnadzii'hi lasto' Ñi'h cun la'hnu'h ya basaa'n Ñi'h guhchi Ñi'h loh cruhzi pur la'hnu'h tin guhca Ñi'h zigazi tuhbi guhn nin bichia'h nahxi para nezloh Dxiohs.

³La'htu nin naapa'h xwiinn Dxiohs nin ayi guuyi tu nin tuhbiti'hn xcweenta cohsa guelgubwihlli nee nin stuhbiza cohsa dxaaba ra' nee nin ayiza sa'bi sto' tu xteenn stuhbi bwiinn, ⁴nin ayiza guuyi tu dxyi'dxyi nin rusia'han xtuhyi la'h stuhbi bwiinn, nee ayiza guuyi tu dxyi'dxyi nin riagadziibachi'hzii yiha tu, nee ayiza gaca tu bwiinn nado'balaadzi, laasii dee ra' ayi xi gallu'yi ra'n mas nin guunn tu gulgadxi'hyi xa gudi'hi tu guelzuxchiilli la'h Dxiohs nin nuu dxibaa', ⁵laasii ya naann tu bwiinn nin naa bwiinn gubwihlli o bwiinn nin riagadziiba garaaloh cosa dxaaba loh xigaaba ñi'h o bwiinn nin rza'bi sto' ñi'h xixteenn lasaa' ñi'h, o bwiinn nin raann dxaan; bwiinn ra' squii' ayi chu'tii ra' ba loh xquelrnabwa' Jesucristu nin naa xquelrnabwa' za Dxiohs. ⁶Gulguia'ha tin ayi chyu gusagui'hi la'htu cun dxyi'dxyi nin ayi gallu'yi ra', laasii pur xcweenta ra' dee' ziaaba xquelnah xteenn Dxiohs yiha bwiinn ra' nin ayi guzo'badxiahga xchi'dxyi Ñi'h. ⁷Ni'chin gulguia'ha tin ayi guidxa'ga tu loh ra' bwiinn ra' chi. ⁸La'htu cadxyih gubahan tu loh nacahyi xteenn duhlda, per nnah

pur nin badzihن gahxu tu nezloh Jesucristu, ni'chin bazia'ñih Ñi'h loh xigaaba tu, ni'chin gulguibahan zigazi bwiinn ra' nin rzah loh xquelña'ñih Jesucristu, ⁹laasii garaa ra' bwiinn ra' nin rzah ra' loh guelña'ñih, ruhnn ra' ba dzi'n za'ca nee zohba dxyi'dxyi guchii rwaa' ra' ba. ¹⁰Ni'chin gulchi'hyi xa gusiahxi tu lasto' Daada Jesucristu. ¹¹Ayi chi'hyi tu xa guidxa'ga tu loh ra' nin rzah ra' loh nacahyi xteenn duhlda, mas gulgui'hnn xa guluu'yti tu la'h ra' ba xa nabahan tu loh lla'ñih xteenn Dxiohs tin zi'chi gacabwa' ra' ba nabahan ra' ba loh duhlda. ¹²Laasii hasta xtuhyi naa chyu guuyi xcweenta cosa dxaaba nin ruhnn ra' ba rala'n. ¹³Per chin riinloh ra' garaa ra' dzi'n dxaaba ra' rii' loh guelña'ñih, ria'han nayaa ra'n ¹⁴laasii ruzia'ñih guelña'ñih yihtcan. Ni'chin caa loh dxihtsi squii':

Babahn yi'h nin rahsi xa'ta lu'h, gwastii loh ra' bwiinn guuchi, ya Jesucristu guzia'ñih yihtca lu'h.

¹⁵Pwihsi ni'chin gulguibahan za'ca; ayi guibahan tu ziga bwiinn nin naa bwiinn dxiipatii' ra', sino que gulgahca bwiinn nasiin.

¹⁶Ayi gusaa'n tu tiidxi lliaa'ha ra' dxyih, laasii la'n dxyih ra' rii' zeedahlaatii' bwiinn ra' nin ruhnn ra' dzi'n dxaaba ra'. ¹⁷Ni'chin ayi gusaa'n tu gaca tu bwiinn mbah tii'; ni'chin mas gulchi'hyi guunn tu ziga naa xigaaba Daada Jesucristu. ¹⁸Ayi gaca tu bwiinn gwaa', laasii guerree' ruhnn rbwe'hetii' du'h naa bwiinn cun ziga dzi'n dxaaba nin ruhnn ra' ba, mas gulgadi'hi lasto'

tu guunnyihdzi Spíritu Saantu xteenn Dxiohs. ¹⁹Nin guunn tu naa mas bwen gulgui'dxyi'dxyinee lasaa' cun saalmu ra' cun guldxi'lida caantu ra' nee cun himnu ra' la'n lasto' tu para la'h Daada Jesucristu, ²⁰nee garaa dxyih tii' gulgadi'hi guelzuxchiilli nezloh Daada Dxiohs pur lah Jesucristu.

Ziga nahpa guibahannee lasaa' ra' xpwiinn Jesucristu

²¹Ziga tuhbi tu ziga stuhbi tu, gulchuu-gulcha'zi xchi'dxyi lasaa' tu laasii banaa tu bwiinn ra' nin ruzo'badxiahga xchi'dxyi Jesucristu.

²²La'htu gunna'h ra' nin ba bachinaa; gulgazo'badxiahga xchi'dxyi che'hla tu ziga ruzo'badxiahga tu xchi'dxyi Jesucristu, ²³laasii ndxi'hw naa nin nahpa guinabwa' la'h gunna'h nin naa che'hla ba, ziga naa Jesucristu la'h Ñi'h dzi'baloh Ñi'h loh ra' bwiinn nin naa xquido' Ñi'h nin naa ziga tiixi Ñi'h pur nin bata'h Ñi'h la'h ra' ba loh duhlda. ²⁴Ya ziga ruzo'badxiahga ra' bwiinn guido' ziga rnabwa' Jesucristu guunn ra' ba, zi'chi za gunna'h ra' nin nuu ra' che'hla ra' ñi'h nahpa guzo'badxiahga ra' ba garaa ra' xchi'dxyi che'hla ra' ba.

²⁵Bwiinn ra' nin ba bachinaa ra', gulgantsii'hi la'h gunna'h nin naa che'hla tu ziga ruca'hsto' Jesucristu la'h ra' bwiinn nin naa xquido' Ñi'h ya batil'dxiloh Ñi'h pur la'h ra' ba. ²⁶Bwi'hnn Ñi'h squii' tin basiaa Ñi'h xtuhlda ra' bwiinn ra' nin naa xquido' Ñi'h tin zi'chi gaca ra' ba tuhbi bwiinn nayaa nezloh Ñi'h nee biaa za lasto' ra'

ba cun xchi'dxyi Ñi'h, zigazi riaa lahdxi dxiimma cun ñihsa,²⁷ tin zi'chi guluu'yi ra' xpwiinn guido' Ñi'h zigazi tuhbi lla'ñih roo' nee ayi guidxeela nin tayhi cohsa dxiimma cun ayiza xi dxia'dxi ra' ba, sino que gaca ra' ba bwiinn nin naa para la'hsiÑi'h, nin ayi xi tuhbi xtuhlda ra' ñi'h.²⁸ Pwihsí ziga nadzii'hi tuhbi ndxi'hw nin ba bachinaa tihxi gahca ba, zi'chi za nahpa gaca nadzii'hi ba la'h gunna'h nin naa che'bla ba. Bwiinn nin nadzii'hi la'h gunna'h nin naa che'bla ba nadzii'hi za ba la'hgahca ba,²⁹ laasii ayi nin tuhbi bwiinn nin rdxyi'chinee tihxi ba, sino que rahpa ban cun guelnadaa ziga za nahpa Jesucristu la'h ra' bwiinn ra' nin naa xpwiinn guido' Ñi'h,³⁰ laasii la'hnu'h naa nu'h ziga tihxi Ñi'h.³¹ Caa loh Xchihtsi Dxiohs squii': "Ni'chin la'h ra' ndxi'hw rusia'hann ra' ba la'h ra' xcuzahn ba tin rca'ha ba la'h gunna'h nin naa che'bla ba, ya garoopa ra' ba raria'caa naa ra' ba ziga tuhsí bwiinn."³² Dee naa tuhbi cohsa naga'tsi roo', per na'h cañi'n xcweenta Jesucristu nee cun xcweenta xpwiinn guido' Ñi'h.³³ Ni'chin loh garaatii' cada tuhbigah tu gantsii'hi tu la'h gunna'h nin naa che'bla tu ziga nadzii'hi tu la'hgahca tu, ya gunna'h ra' nahpa chuu ba cha'zi ba xchi'dxyi ndxi'hw nin naa che'bla ba.

6 Biñi'ni'hn ra',
gulgazo'badxiahga xchi'dxyi
xcuzahn tu pur xcweenta xchi'dxyi
Jesucristu laasii squii' rga'ha
guunn tu,² laasii squii' naa mweer

dxyi'dxyi lehyi nin guza'loh guni'hi guelnaza'ca la'htu: "Gulgui'hnn lasahca la'h xpah tu cun xmah tu,³ tin zi'chi guibahan nasaa tu nee gaapaa za tu ziroo' guelnabahan loh guidxyiyuh rii!"

⁴ Ya la'htu nin naa ra' daada ra', ayi chi'hyi tu nez guidxyi'chi llii'n tu, mas gulchi'hyi xa gusi'dxi tu la'h ra' bi cun gulguiñi'nee la'h ra' bi tin gaapaa ra' bi guelnadzii'hi xteenn Daada Jesucristu.

⁵ La'htu mooza ra',
gulgazo'badxiahga xchi'dxyi
bwiinn nin ruhnn tu xtsi'n ra'
ñi'h; gulgui'hnnan cun gaduhbi
guelnado'laadzi xteenn tu, nee
gulcui' guelnadxyi'bi la'n lasto' tu
ziga tin ayi gadxeela tu cayaal'lla
tu loh xtsi'n ballwaa'n tu mas
gulgui'hnnan zigazi cayuhnn
tu la'gahca xtsi'n Jesucristu.

⁶ Gulgui'hnn xtsi'n ba cun gaduhbi
sto' tu ayi chin zuu si dxi'h ba
loh tu tin ayi para guunn si dxi'h
dxia'han za'ca tu loh ba; maz
gulgui'hnnan ziga guluu'yi naa pa'h
tu xpwiinn Jesucristu ziga cayuhnn
tu cun gaduhbi sto' tu ziga xclaa'dzi
Dxiohs gaca.⁷ Gulgui'hnn xtsi'n ba
cun gaduhbi sto' tu zigazi guluu'yi
cayuhnn tu tuhbi dzi'n nezloh
Daada Jesucristu, ayi nezloh dxi'h
tuhbi ndxi'hw,⁸ laasii banaann
tu cada tuhbigah tu nicala naa
tu bwiinn nin gudoo' loh dzi'n o
bwiinn nin ayi gudoo' loh dzi'n,
zica'ha ba loh Daada Jesucristu
ziga naa xcweenta dzi'n za'ca nin
bwi'hnn ba.

⁹ Ya la'htu nin naa ra' ziga
ballwaa'n ra', gulgahca nado'laadzi
za nezloh ra' xmooza tu nee ayi

gusa'cazii tu la'h ra' xmooza tu laasii banaann tu la'htu cun la'h ra' ba nacweenta tu ziga mooza gahca nezloh Daada Jesucristu nin nuu dxibaa' laasii la'h Ni'h ayi ruhnn Ni'h guriin-guriin nezloh cada tuhbigah bwiinn.

**Nin rulaloh la'h ra' xpwiinn
Jesucristu loh xiichi'hzi**

¹⁰Yannah bwiitsi ra'n, gulgahca bwiinn nadxiipala'a'dzi loh guelrahcanee xteenn Daada Jesucristu pur xcweenta guelrnabwa' roo' nin nahpa Ni'h. ¹¹Gulgahcu ziga lahdxi dxi'ba xteenn Dxiohs nin gulaloh la'htu, tin zi'chi guunn tu gahn guti'dxiloh tu loh garaa ra' guelrusagui'hi xteenn bwiinnndxaaba, ¹²laasii ayi chyu cadxihndxinee la'h tuhbi bwiinn nin caa bwe'hla cun nin nuu dzihta, sino que dxudxihndxinee nu'h la'h spíritu ra' nin naa ra' ziga bwihih nin za'bi nezloh bwihih nezllaal'ndxiiba' nin ca'ha guelrnabwa' cun nin ca'ha guelguxchisi, cun nin rnabwa' ra' za loh guidxyiyuh nacahyi rii', nee cun neezaa nin nahpa guelrnabwa' nezloh bwihih gadiidxi guidxyiyuh. ¹³Pwihsni'chin gulcul'guihn gacu tu zigazi tuhbi lahdxi dxi'ba nin gulaloh gaduhbi tihxi tu nin naa xteenn Dxiohs, tin zi'chi zahca guti'dxiloh tu loh garaa ra' dxyih dxaaba ra' tin chin ba bat'i'dxiloh tu loh dxyih ra' chi zahca suh dzi'tsi tu. ¹⁴Gulsudzi'tsi pwihsli loh ganaalla nin naa nanchii pa'h, nee gulgaca nayaati'l loh dxyi'dxyi nanchii. ¹⁵Gulcwihnasiin, pwihsli, tin guzee tu chegaluu'yti tu xchi'dxyi Jesucristu nin rbahchidxyii lasto' ra' bwiinn, ¹⁶laasii guelriachiisto' tu gaca ziga nin suu caa loh ra' bahza

ra' nin zohba bwehla yihca ra' ni'h nin naa xteenn bwiinnndxaaba. ¹⁷Pwihsli nin gula'loh loh xigaaba tu naa naann pa'h tu gula'h tu loh duhlda, ya xchi'dxyi Dxiohs naa ziga tuhbi spahda nin runi'hi Spíritu Saantu la'htu. ¹⁸Pwihsli ayi gusaa'n tu ziga cwiidxyi-guinaaba tu loh Dxiohs garaa dxyih cun guelrahcanee xteenn Spíritu Saantu, nee gulgahca nasiin cun ayi guiria'hgahn tu, nee gulcwihdxyi-gulguinaaba pur xcweenta garaa ra' xpwiinn guido' Dxiohs. ¹⁹Gulguinaaba za loh Dxiohs pur xcwee'ntahn tin zi'chi guni'hi Dxiohs dxyi'dxyi nin guini'n nee tin ayi guidxyihibihn guini'n dxyi'dxyi naga'tsi xteenn Jesucristu. ²⁰Dxiohs guxe'hla na'l h tin gulu'yi'hn dxyi'dxyi rii', nee pur xcweentan nin nuuñie'w'hn nnah. Gulguinaaba loh Dxiohs tin zi'chi guini'n dxyi'dxyi rii' sin ayi guidxyihibihn, nee guiga'ha guini'nin.

Lulchima guelrgahpa Dxiohs

²¹Tíquicu, nin naa bwihtsi dzi'tsi nu'h loh xcweenta Jesucristu, nee nanchii naa xigaaba bi loh xtsi'n Daada Jesucristu; la'hbi dxi' bi tin guuyidxyi'dxyi bi loh tu cweenta ziga caza'ca'hn. ²²Pwihsli ni'chin guixe'hla'hn bi para la'htu tin nnaa bi loh tu xa dxuu nu tin zi'chi cu'gui'w bi lasto' tu.

²³Daada Dxiohs nee cun Daada Jesucristu guni'hi guelridxyiisto' cun guelruca'hsto' lasaa' nee cun guelriachiisto' la'htu nin naa ra' bwihtsi lasaa' ra' nu'h loh Jesucristu. ²⁴Ya zuhnntaa'yti Ni'h yihca tu garaatii' tu nin zeezahdzi'tsi ruca'hsto' la'h Daada Jesucristu. Zi'chi gaca pwihsli.